



Iulius honesta familia natus, & in omni genere literarum à teneris annis optimè institutus fuit. Is cum prima artium & linguarum fundamēta iecisset, sese hinc inde ad varias Academias contulit, atq; Philosophiæ et Medicinæ diligentem operam nauauit. Itaq; factum ut suprema earum scientiarum insignia sibi compararit. Erat is artis Medicæ peritissimus, quam etiam magna hominum admiratione felici successu exercuit. Id cum Ferdinandus Imperator cognouisset, eum ad suam curiam uocauit. atq; ei sui corporis curam commisit. Ibi non modò Iulius Cæsaris familiæ, sed etiam exteris hominibus medicamina exhibuit, & talis

fuit, ut cunctis esset gratissimus. hinc factū ut eius consilia etiam longinquius expeterent. Is anno millesimo quingentesimo sexagesimo secundo, cum Maximilianus Ferdinandi filius Franckoforti Cæsar eligeretur, cum suo Imperatore interfuit, & ob rerum usum omnibus innotuit. Huius laudes in mea præsentia Salisburgi à uiris doctis celebratæ, ut meritò eum huic operi inferere uoluerim. Anon.